

O.D.E.A. celebrando nan 20 aña di existencia

ORANJESTAD(AAN)—

Sr. Richard Maxwell, presidente di ODEA/C.N.O., a informa cu for di 1986, despues cu nos pais Aruba a sali for di Antiyas, un grupo di enfermeronan di Aruba a pre-mira, cu e unico instrumento pa mantene of mehora nos salubridad publico y calidad di cuidu pa nos comunidad ta door di funda nos propio organisacion di enfermeronan di Aruba, awe conoci como ODEA.

ODEA a wordo funda dia 18 di januari 1989 y ta un organisacion legal y reconocida. Su meta ta concientiza, informa y stimula enfermeronan y otro trahadornan den cuidu, pa sali na vanguardia di e patient y garantiza un bon calidad di cuidu. Tambe ODEA ta observa cu wowonan critico pa e educacion pa bira un enfermero ta cuadra cu e exigencianan y normanan cu ta wordo stipula pa The Caribbean Nurses Organization y The International Council of Nurses cu su sede na Ginebra, Suiza.

Tambe ODEA ta vigila e sistema di registracion di profesionalnan den enfermeria, pa garantiza asina cu nan diploma ta cumpli cu e exigencianan pa cu nos profesion.

Tambe ODEA ta stimula e departamentu di inspeccion riba tereno di Salubridad Publico pa hasi investigacionnan necesario pa evita situacionnan cu por surgi cu por afecta nos calidad di salud y cuidu na Aruba.

Tin hopi desarollonan ta tumando lugar.

Den e desarollonan nos como enfermeronan cu a scoge pa cuida e patient, mester anticipa riba posible consecuencianan di e desarollonan.

Tanto esnan positivo, pero sigur esnan negativo cu por perhudica e calidad di cuidu cu e patient ta exige di nos, como esnan cu ta 24 ora na su cama.

Tecnologia a hasi stapnan grandi y acelera riba e tereno di salubridad.

Esey tin su bentaha pero alaves su desventaha.

Solamente si nos como enfermeronan ta capaz y

competente pa evita cu e "High Tec" no domina e "High Touch".

Pa nos e "High Touch" ta keda e base fundamental pa garantiza un cuidu, eticamente responsabel y caminda e hende cu nos ta cuida tur dia mester di nos tanto riba e tereno fisico, mental y social.

Si nos perde e habilidad di mira e patient for di e bista holistico e ora nos enfermeronan y otro trahadornan den cuidu tin un problema.

Ta importante pa nos realisa cu nos como enfermeronan ta e grupo di mas grandi cu diariamente ta desplega nan trabou den diferente sector di cuidu aki na Aruba.

Nos por conta sigur cu na tur nos ta forma un grupo di mas o menos 600 trahador den salubridad y cuidu. Pesey ODEA a lucha hopi e ultimo añanan pa no exclui ODEA for di decisionnan clave ora ta trata asuntoonan cu ta riguarda e calidad di cuidu pa cu nos patientnan. Al contrario ODEA mester ta involvi den tur e asuntoonan cu ta trata cuidu y bienestar general ODEA como e grupo di mas grandi den salubridad y cuidu de facto ta e fuente di informacion, investigacion y cu tin e experiencia y sabiduria amplio cu por sinta dialoga y intercambia di idea den cualquier comision, grupo di conseho, plataforma nacional etc.

Ultimo añanan ODEA ta hayando mas y mas oido di nos mandatarionan p.e. nos minister di Salubridad, tambe di e directivanan di diferente instancianan den sector di cuidu.

Tambe ODEA a wordo invita door di un delegacion di Staten di Aruba pa asina nan ricibi informacion y hasi pregunta na ODEA pa cu e calidad di salud y cuidu di nos pais Aruba. Minister Wever di Salubridad Publico tambe ta mira mas y mas e balor y importancia pa cu ODEA.

Pa conmemora ODEA su 20 aña di existencia, ODEA ta organiza un siman di enfermeria durante e siman di 11-15 di mei 2009, cu nos lo elabora mas despues ariba dje.